

池州府志卷第八十一

中憲大夫知江南池州府事加六級襄平馬世永編纂

武勲傳第二十四

宋黃太尉舊志失其名池人也相傳仁宗時張瓊薦太尉率兵征西涼太尉聞命大哭其妻怪問之太尉曰吾大父征西涼歿于彼吾父征西涼又歿于彼吾今往有死而已妻雖有身三月然未卜男女是以哭妻乃以重貨賂瓊求免不得及往陷賊中妻妊一女名奉先年十八憫其父之陷於賊也隻身走西涼挾之返朝廷特晉太尉秩更加賚焉卒葬池州東門外俗呼之爲相公墩

而城內有宋太尉府即其宅也

夏賢貴石埭人舊志不詳其所自始高宗時位至將軍適埭人蔣姓者以妖術惑衆爲亂朝廷命賢貴以兵三千討平之後與金人戰不克死今邑內迎恩橋有夏氏

故宅遺址

今稱夏家巷

元方升貴池人爲水軍都統制

明顧成字景昭貴池人幼質直狀魁梧往來江淮間嘗自文其身以示異太祖起滁陽充帳前親軍擎蓋侍左右初授百戶以功歷金吾副千戶指揮僉事從平蜀破貴州蠻克普定遷普定衛指揮使晉都指揮同知大兵

雲南以成斷後扼普定晉都督僉事尋充征南將軍

貴州征五開六洞破一百三十七砦而太祖崩建文君即位詔成班師晉都督同知右都督靖難兵起詔從盛庸至真定戰敗被執成祖親解其縛慰之曰善且大用汝隨軍中尋遣至北平侍仁宗居守成祖即位論功晉左都督封鎮遠侯與世券又命出鎮貴州搗臺羅斬叛酋普亮羣蠻震懾尋召還致仕居江都年八十五卒贈夏國公謚武毅子統先卒孫興祖嗣侯歷數傳皆著功績加祿勿絕

吳成貴池人從太祖以開國功授雄武衛百戶世襲傳

子旺以靖難功歷龍虎衛指揮同知世襲傳子恭調杭州前衛以後遂居浙

甯駟青陽人以武從太祖立功歿于陣授錦衣衛千戶世襲駟亦以軍功授總旗歷驍騎右衛中所百戶世襲洪武二十二年晉錦衣水軍千戶

胡慶字慶之石埭人太祖爲吳王時以百戶從屢著戰績定鼎後晉江南都指揮使居當縣

羅貴貴池人以戰功授杭州右衛左所權百戶世襲遂家于浙

陳繼文青陽人初戍雲南以輸粟累功世襲曲靖衛指揮事遂家焉傳子玘隨征貴州蠻歿于陣後裔孫輕

靖衛官籍發解成進士官臬僉卒還葬青陽

有萬里貴池人由千戶立功歷遼東定遠衛指揮使

世襲中二年武進士歷神樞營參將歸常跨一驢徜徉山水間而矜恤貧乏至老不倦也

紀元憲字蓋我貴池人以萬曆三十一年武舉中三十二年武進士由偏裨歷鎮守廣西總兵官右軍都督僉事挂征蠻將軍印威名震徭獞子玄照字然明號雪樵承其家業中萬曆四十六年天啓元年四年三科武舉

而雅好文墨明末從閣部史可法軍中屢著勞績歷官
至後軍都督同知 本朝順治二年我兵下江南玄照
率所部來歸令復原職未幾回里卒所著有滄浪衣衲
豹霧集

金文光字朴只石埭人幼習書史而沈雄擅韜略以萬
曆三十一年武舉中三十二年武進士授成都守衛遷
福建都指揮司左使丁父艱武臣例不得守制文光固
請去位許之崇禎初科臣鄒維璉薦起江西南贛參將
會屬境土賊踞九連洞爲寇害流毒及閩廣文光以兵
深入勦平之贛人爲立祠以報明亡歸里著述以壽

儀鳳貴池人幼習儒旣學騎射遂嫻武事以萬曆二
十八年三十一年三十四年三科武舉中四十四年武
進士第一人授廣東屯田都司僉書力倡興屯軍以不
乏逾年遷廣西都指揮使却常例遷廣州叅將適紅毛
夷行劫海上率兵却之整頓軍實一軍無冒餉者擢南
路副總兵致仕歸著韜略全書行世子懋昌以萬曆四
十五年武舉中四十六年武進士由遊擊叅將歷貴州
安順副總兵撫馭羣蠻頗著方略加前軍都督同知崇
禎十六年調泗州護陵副將道武昌遇賊張獻忠且戰
且走至泗州甫一月擒永城叛將劉超以獻會裁缺撫

臣移留本郡城守領鄉勇五百人佐兵備程世昌守禦甚力鄉里德之

桂應菁號雪潭石埭人幼擅雄略爲諸生憤明季時事乖失入京上書指陳得失不報乃出關以策干總兵白某遂留軍中屢著勞績題授京畿左翼遊擊歷南京提督巡捕營總兵官加後軍都督同知 本朝順治二年太兵下江南乃歸里子自錦以康熙十一年武舉歷左都督湖廣德安營叅將封應菁如其官

汪思誠字純一貴池人素倜儻混跡賈人崇禎間史可法備兵池州始識思誠招致幕下漸見親信隨可法

府江上始題授軍職歷晉副總兵每臨陣脫可法於險

法守揚州城破自盡思誠亦同日死

本朝郎應徵字子四晚號且園銅陵人幼習經書完性而諳騎射順治五年中武舉十二年成武進士康熙初授四川建昌衛守備建昌自遭獻賊後隄壘蕩然應徵時勤修築以資守禦又增設塘汛備巡哨焉間署游擊爲鹽井設防甚力而整頓營務得士卒心十一年請告歸里承養其親間作詩文自娛歷壽考以歿所著有且園草且園紀略

曹曰璋字繼武號秀山貴池人父光國倜儻有大志始

池州府志卷八十一
五
仕不遂乃遊都門占籍京衛授一子以文授一子以武
曰瑋習騎射兼通經史大義卓犖超其羣康熙三十二
年年二十三舉順天武鄉試第一三十三年會試中式
對大廷弓馬對策俱莫與儔者

上於是親拔置一甲一名賜武進士及第即授二等侍
衛直禁中三十六年隨

駕征厄魯特著勤勞屢被內紵蟒衣酒果之賜三十九
年出爲山西利民路叅將舉卓異推陞浙江金華副將
引見赴京師

上以利民地方緊要著以新銜留原任四十四年奏
特旨遷陝西固原西路靖遠衛副將隨丁內艱著在任
守制四十五年春即擢陝西興安漢羌等處掛印總兵
官令速赴新任時漢江暴漲州城被水臨盡圮曰瑋至
官日督軍士晝夜巡防致感寒疾卒年僅三十六歸其
喪貴池

上聞悼惜賜祭葬如例曰瑋之在官也克矢勤慎而馭
卒伍嚴而有恩所拔必材勇果敢之士不以私故
上欲大任之而未竟其用也惜夫

池州府志卷第八十二

中憲大夫知江南池州府事加六級襄平馬世永編纂

逸民傳第二十五

唐高霽字暄之秋浦人隱居石門山桃花塢李白嘗遊其地白又嘗與霽同憩於青陽夏侯迴之堂眺九華聯句層標過遞日半壁明朝霞霽作也其作著作不傳舊志

無今補

王繩未詳字里大曆間人與河東耿淖善淖有雪後宿王繩池州草堂詩曰宿君湖上宅琴韻靜參差夜雪入秋浦孤城連貴池流年看共老銜酒發中悲良會應難

再晨雞自有期似繩為池土著而隱居者也按舊志載此詩題作

玉繩草堂蓋傳寫之誤遂沒其人之姓名矣今照耿湜集更正

鞏疇字禹錫秋浦人號九華處士宣歙池觀察使鄭薰與之遊後疇入洛訪薰薰贈以詩并序曰九華處士鞏疇擅玄言之要通易老其於淨名僧肇尤精達余在白溪時重其能車幣而致之及到官舍再說易一說老氏將兒姪輩執卷列坐而傳之老氏業畢而寇難作與鞏各散去不知其何如存邪亡邪余既休居洛師鎖扉獨靜已卯冬十一月半雪中有客扣柴門樵童視之走復曰九華鞏處士遽下榻開關執手話艱苦鞏背笠笈卓

杖靈壽下笠見哈笑山間公恬養澹逸不屑於榮悴

故以玄來助成之升榻解笈散四書即易老淨肇也明日講肇論階前多偃松高桂冰凍墮落有金石琴瑟聲理致明妙神骨超爽自謂一時之遇日與故人為徒又意此樂之難偕也遂成二十韻贈之密雪松桂寒書窗導餘清風撼冰玉碎階前琴磬聲榻淨几硯潔帙散縑緗明高論展僧肇精言資鞏生立意加玄虛析理分縱橫萬化悉在我一物安能驚江海何所動丘山常自平遲速不相闕後先徒起爭鏡照分妍醜秤稱分重輕顏容寧入鑑銖兩豈關衡蘊微道超忽剖証音泠泠紙上

掣牢鍵舌端搖利兵圓澈保真性客塵排妄情在住即
非住無行方是行疏越捨朱絃哇淫鄙秦箏淡薄貴無
味羊斟慙太羹洪遠包乾坤幽宵潛沈冥罔煩跬步舉
頓達萬里程廬遠尚莫曉隱留曾誤聽直須持妙說共
詣毗邪城可以識疇之素學矣今疇祠在白笥
王季文字宗素青陽人少厭榮利居九華遇異人授九
仙飛化之術曰子當先決科于詞籍後策名於真列冥
注使然不可移也登咸通二年進士第授祕書郎謝病
歸築室頭陀嶺下曰浴龍潭風雨不失期或終日對客
而鄉人亦於龍潭諸處見之臨終捨宅為寺今之無相
院是也

康駟字駕言居秋浦之黃老山篤於自修不嗜聲利咸
通中始隨鄉試貢春官積十一年客秦客洛隨所見
聞輒為記錄而以黃巢之亂攜歸池陽亡逸都盡及登
乾符進士第後復于黃老山憶記亡失綴為二編名處
談錄不聞其仕進也一曰田頴在宣州聘為上客又曰
仕終中書舍人恐未必有是

韋豸秋浦人以能賦名光化中至長安翰林吳融奇其
文薦之京兆試第一歸隱九華山以終
南唐夏鴻貴池人與兄鵬同砥高行鵬碎團練推官鴻

終隱不出人罕見之者嘗與其兄同輯十三代史略子
乾錫自號清溪布衣樊若水嘗師事之及入宋若水知
池州薦之朝藝祖以冠服徵之不赴時推爲一門高尚
云

陶守立貴池人保大後見江南國事日非遂不應舉隱
齊山以詩筆自娛兼工畫佛道鬼神山川人物至於車
馬臺閣筆無偏善嘗於九華草堂壁畫山程早行圖及
建康清涼寺畫海水李後主金山水閣畫十六羅漢像

皆振妙于時者也見宋郭若虛圖畫見聞
志劉城探入池州雜記

宋劉放字世疎青陽人隱居九華之雙峯下自題石壁
曰清隱巖自嘉祐訖熙寧朝士多過訪者亦刻姓名于
石至和二年著九華拾遺一卷有自序見文獻通考

陳翥銅陵人好閑靜却掃著書即家人亦非其時不見
因稱爲閉戶先生通考引陳氏曰銅陵逸民陳翥撰桐
譜一卷

李國平紹興間建德隱者

程太古字介翁青陽人紹定間隱居九華合僧應物滕
子京九華新舊二錄增以近人詩文爲九華總錄十八
卷見文獻通考

陳巖字清隱青陽人自號九華山人博極羣書負用世

大志當宋末屢舉進士不第入元遂隱居不出時元世祖徵求隱逸乃汗漫江湖以避之及老始歸青陽築室于所居高陽河有樓曰溪山第一樓有池曰臨清池有室曰靜觀曰燕居曰嘯歌其內出則徧歷九華之勝至一處則作一詩以繫之名九華詩集又集杜詩爲鳳髓集同里方時發揚少愚序而傳之大德三年卒

清谷居士不知何許人元初隱居于石埭縣七里之南山自號清谷居士有南山謠曰南山之陽有盤谷盤谷之間土赤而林青薪可樵田可耕滔滔天下徇功名恥與蠅蚋爭羶腥擊有心之磬彈無弦之琴采鼈山高巖魚泉深晝常隱几夜不關門清風時來好鳥流音身識寒暑目成古今噫嘻噫嘻不知老之將至而山川之如故吾寧不感于心哉乃爲之謠曰石泉泠泠兮若話音屈子勞生兮非善淫抱膝長歎兮涕沾襟可以偷生兮深山岑所著有清谷集

元楊少愚青陽人幼好學於經史無不該貫而隱居不仕所著有老經衍義九華外史秋浦集

明郎禮鄉貴池人元正順中舉人材官理問而不樂仕進築煥園於城外杏花邨居之嘗作詩自詠其勝明洪武三年詔戶部覈民數各給以戶牒禮卿遂請牒編戶

貴池終身不復出其牒至今存

本朝劉城字伯宗晚更號存宗貴池人幼折節讀書尤喜郁離子及長爲文雄放與里中吳應箕齊名出則徧遊名公卿爲復社者日時明季四方多故城慨然有救世之志所爲書疏論議歌詩皆切中時弊有關世運乃屢蹶場屋不得用崇禎九年詔在京三品在外藩臬各得薦所知之堪任州縣者安池道史可法及江西布政使張秉文交薦城就徵吏部會其事寢歸十六年始應歲貢而明亡矣避兵山谷轉徙數年齋志以歿祀府鄉賢所著嶧桐集二十卷他著述詳藝文子廷鑾

會字際甫青陽人性素冲夷而嚴于出處舉明崇禎九年應天鄉試再上公車入本朝遂不復出時里中荒亂輒出穀煮糜賑飢者而招撫羣盜使爲良民里中賴以復靖

江杏字君培建德人性孝友通經術精天官卜筮兵家者言方明啓禎間人不知兵革杏觀星象變異惕然憂之乃撰集戎政先知十卷未幾流寇起天下騷然人始服其先見崇禎十七年始應歲貢而明亡江南僭立逃撫程世昌開府蕪湖辟杏贊幕府爲草請移蹕江北及自將六軍等疏上之不報知事不可爲遂歸隱天山洞

數年卒所著有易心鑑史綱彙說天文志戎政先知資乘瑣言若干卷

李慤字敬仲貴池人生有至性好讀書嗜古上考蒼頡史籀之文以作禮傳寫即自爲詩文亦必以古體書之牢扃篋中不一示人也晚值多難益自匿日誦離騷或礪劍以爲常積數歲愈感憤凋瘵以卒所著有野查集何煜字寤明青陽人性倜儻喜交游工帖括既又厭薄之益肆力于古嘗築別業于城東種雙柑讀書其下崇禎間四方多故煜乃集左氏兵法一卷攜入都謁襄城

李國楨無所遇去而至秦藩亦不偶乃遊吳下客金陵數年感憤無聊以卒所著雙柑園集佚不傳虞山錢謙益有次韻答何寤明見贈詩曰桃李何曾怨不言沅湘憔悴自蘭蓀劫灰蕩掃文章貴星緯消沈處士尊江左風流餘汝在襄陽耆舊幾人存新詩攜去誇春社一字須傾酒一尊可以槩其人矣

譚巖字維石青陽人素博洽善詩歌遭時喪亂自匿于所築衲竹居貴遊過之輒不見而常與田叟牧豎泥飲卒

吳光錫字少友青陽人早嗜學工篆籀與兄光裕齊名喜沈飲自號釀王嘗築一室名花舫讀書其內故里中

亦稱之爲花舫先生後遭喪亂棄諸生爲汗漫之遊旣而歸修九華全志卒

吳鍾字空之青陽人父文梓官給事中有直聲鍾少孤嗜學爲文仿曾南豐才名翕然動江左遭時喪亂乃卜築於宋劉世疎舊隱曰劉冲著書送日以卒所著有方亭文存呵凍錄忠鑑循良錄見思篇雙峯詩劉冲山人集

余學重字任夫建德人幼工文隨父讀書皖江與劉若宰同席研才名相埒未幾若宰及第第一而學重困頓諸生間猶自淬厲崇禎十七年應歲薦而遭喪亂乃棄巾服棲山中以著書爲事足不踰外戶者十餘年歿不宰鄭三俊題其墓曰安節先生之墓

曹參芳字曰贊貴池人幼倜儻於書無所不窺明崇禎末史可法程世昌先後觀察池州俱許參芳可大用及遭喪亂乃隱深邨益研易理學者俱稱之爲心易先生所著有六經大義諸編

鮑光義貴池人素孝友兄早歿敬事其嫂而雄于文其歌詩激昂日喜中更喪亂遂棄諸生隱於七松里輯周易講義若干卷以終

檀明庇字子民東流人幼喜讀書自經文子集以及天

池州府志卷八十二
八
文地志兵家者言無不通習于疑義闡發殆盡制舉義則酷喜震川大士正希諸家而最重行誼嘗爲親族撫孤子恤嫠婦指困倒橐不以爲疲也年甫壯即棄舉子業自匿於所居赤水之濱逍遙漁釣以老年七十一將卒囑其子曰吾死後爲吾題赤水懶人檀子民之極足矣其所著不傳

吳非字山賓又字大非貴池人家素貧舌耕養母及其弟而喜著書尤長于論史其族兄應箕暨同邑劉城見其所著俱許以爲必傳中年歷喪亂乃深自避匿購半堂以居每乏食出就館穀與修江南通志然與世終不相洽也晚歲以其里有古牛山自號古牛以歿年八十有八所著書篇目甚多詳藝文志

池州府志卷第八十二

池州府志卷第八十三

中憲大夫知江南池州府事加六級襄平馬世永編述

孝友傳第二十六

唐何澄粹青陽人親病日錮俗尚鬼病者不進藥澄粹剔股肉進親疾為瘳後親歿伏于墓哭踊無數以毀卒

當時號青陽孝子為作誄甚眾

舊志略今照唐書錄

後漢柯堅建德人篤孝行尚義有司聞之朝屢徵不就宋方綱青陽人其先世自唐咸亨間居九華山東之上田至綱為家督歷四百年合七百餘口同爨而食每晨起鳴鼓集家眾睦睦無間言著家法三卷景德二年青

陽饑網出粟五千石以賑轉運使馮亮聞其事於朝詔
旌其門為賜復而網特授銀青榮祿大夫檢校國子祭
酒

余走銅陵人其家聚至千三百餘人同爨而食起為之
督周洽無間言子孫俱業儒貴顯不絕

鍾雋字頴叔銅陵人官祕書郎其先從唐時至雋十一
世同居合家眾七百餘口而雋為之督性至孝事親無
少違朝命獎其義

柯應烈建德人性至孝母閻氏病不解衣帶以侍湯藥
癯瘠盡瘁每夕露禱願減算以益母壽俄聞空中有聲
許其特延一紀其母果復活十二年而歿見續文時江
獻通考

淮盜起應烈破家財募眾保鄉里賴以安有龔吏部者
欲官之母語之曰吾家代以文發身何事旁曲為竟不
就

汪與成銅陵人建炎間池遭寇虐與成家一百八十口
盡斃焉後三年與成既改葬其父念尚不得母屍為刻
木肖像以侍之十年祔于其父之墓

葉蒼貴池人性至孝其母於九月病渴思生李蒼走哭
園中李樹下忽從葉底得雙李以奉母病以痊人咸以
為神賜云蒼家鐵券山乾道三年周益公必大嘗止其

舍稱之爲秀才子梓字元材善治生權林皆鄉貢進士
楠第進士令績溪另有傳孫之實亦鄉貢

諸大道青陽人嘉定間博士父信令青陽而歿即葬九
華之百尺潭三年廬墓側奉侍如生明初其廬猶在常
遇春率兵過之題詩於壁稱頌而去

元方時發字子春青陽人綱之後一依綱家法爲義門
督邑令史午間於朝詔旌之爲復其役授時發潮州教
授改徽州教授以歿

李鵬飛池州人生母姚氏爲適母不容改嫁爲朱氏妻
鵬飛幼不知也年十九思慕哀痛誓學醫以濟人願早

見母行求三歲至蘄州羅田縣得焉時朱氏家方疫殞

飛起之遂迎還奉養久之復歸朱氏時渡江省覲旣卒

歲時攜子孫往祭墓終其身以有司請旌其廬見元史吳非採

入池事
未盡錄

明紀孟綱貴池人善養親不離晨夕有司欲薦之朝以
親老不應人至今稱之

董希仲貴池人性至孝日不違其親洪武三十二年舉
應天鄉試以親老不就選奉菽水以終其世焉

洪同安建德人父仲遵與其母俱早背同安不勝哀慕
至老不渝先聖裔孔諤爲之記柯東岡是爲之作翠壁

歌以紀之

童彥芳建德人洪武間從洪仲遵遊不爲章句之學其家五世同寨登其庭盜盜如也柯暹爲之作朱崖歌楊永顯石埭人母陳氏病篤永顯割股和藥以進母病瘳正統間歲大饑父歿遺命藁葬永顯不從盡力具棺殮躬自築墳葬之

李源建德人性至孝父病割股和粥以進且籲天願以身代父病漸瘳父歿廬墓三年朝夕哀慕柯暹書如在二大字遺之

舒偉貴池人事母孝成化十三年舉應天鄉試肄業北監聞母訃徒跣奔歸哀動行路析家產悉推與其兄後仕爲浙江湖州府推官執法不回一權貴人求偉稍上下之不可罷歸

唐輝石埭人以成化八年貢仕爲浙江紹興府檢校其父母相繼歿于家訃至輝即日號慟奔歸以禮畢葬廬墓側三年哀毀如一日有司旌之

夏鎮

明府志
鎮作震

石埭人成化間父早逝家貧爲傭以養母

母病目將盲鎮每日以舌舐之母目復明後母歿殯於野結茅其側三年哭不輟聲一日野燒及其廬鎮伏棺痛哭俄返風熄火柩以獲全時人莫不異之

柯茹建德人父羅母胡氏偕老林下疾亦不解帶以待
父歿兄薰仕於外茹總家政百口共炊月朔必申明父
遺訓以爲之督後其兄致政歸猶共席以食疾必親湯
藥以爲常弟蔚亦事兄如父壯年喪偶不再娶而輒喜
周人困乏里人重之謂東岡先生多令子云

曹奎字煥璧建德人性孝友痛父母之早逝也語及必
終日涕泣而最敬其兄煥理并篤交友與同里柯薌

溺江水不獲其屍奎沿江號哭求之薌屍忽從急湍
中躍出遂收歸葬焉兄煥理亦甚友愛奎奎病刲股

和藥以瘳史戴珊爲傳其事

張春東流人洪治元年貢事母至孝母病湯藥必親必
必稽首北辰以祈母壽舊志稱之

吳澈字靜卿貴池人弘治十年貢不仕事繼母許氏以
孝聞兄弟五人俱相友愛課子姪誠族人各殫其力先

輩每稱其方正云

陳希哲希爵希和銅陵人兄弟三人俱有孝行同廬墓
六年感靈龜之瑞郡推李循義贈以詩曰喜聞孝感志

銅官殘蠟收光對雪看三子有情廬墓泣六年無語問
家安野塘龜見正驚蟄獨樹花開不避寒起坐清江天

夫曙欲馳封事五雲端希哲希和俱弘治間貢希哲官

山東日照縣訓道

陳璋青陽人事親孝其飲食必親調以進父歿廬墓三年母喪亦如之

李希仁青陽人少孤事母以孝稱母歿廬墓三年哀毀如一日正德十三年有司上其事詔旌其門

程暉青陽人本宋青陽開國公九萬之後其父甫娶而歿母吳氏年十八遺腹生暉備歷艱辛育之至長暉嘗痛其母之苦節未嘗也洸瀾不已正德十三年徒步詣京師三擊登聞鼓刺血爲疏上求旌表許之詔有司建坊於其里後桐城方以智爲之傳其事

陳鎬青陽人性至孝三月間母患熱疾思冰不可得鎬夜半走九華深谷中得之以進母疾差越數月母病復作鎬又親嘗其糞母亡鎬亦以瘁卒

何桎林建德人事祖母至孝祖母病刲股進之愈又歷十二年而歿

畢貴石埭人父盧生既歿而其母俞氏始生貴嫠而貧撫貴長竭菽水之奉母歿及葬致奠必哀人皆稱其純孝後以孫蚡贈資政大夫南京戶部尚書

胡大武號東莊貴池人幼與同里李呈祥友善嘉靖三年貢入太學未卒業聞母瞽馳歸朝夕不離母側者八

年母目復明人以為至孝所感李呈祥為作愛日詩以紀之一時和者成集晚謁選為福建永定知縣以愷悌為治踰年歸百姓攀留載道人又以為至孝所推云所著有東莊詩集東莊論草子潛亦以孝稱

徐完字廷成建德人幼有至性喪母哀痛迫切又恐傷父心隱而不發事繼母以孝聞一日盜劫其家執完問其父所在完不應以刃脅之終不言盜感歎而去後其父歿廬墓三年終身不踐其坐處又痛其母之未逮養也刻木肖像設帷牀具櫛沐出告反面者三年然後穿墓旁瘞之時完年已七十其孺慕猶如此

畢永高石埭人性至孝嘗割股和粥以愈母疾而虔事其兄終身無間人以橫逆相加者事過輒忘若遇人困急則竭力濟之不少倦後以子鏘贈資政大夫南京戶部尚書

桂馨字子德貴池人幼育於繼父以孝稱應嘉靖十二年恩貢仕為湖廣南漳知縣調竹溪尋遷北直隸河間府通判聞繼父歿奔歸執喪盡禮又念不能為本生父母服也常隱痛不言後補浙江台州府通判歸

陳桂字汝芳貴池人以嘉靖十三年選貢仕為北直隸尋縣知縣自持廉靜罷歸孝事其父父年九十五歿桂

戶七十餘矣猶哀毀不輟時咸稱其至孝云
余永江銅陵人侍繼母孝母病親侍湯藥居喪盡哀備
禮且時周族之孤寡衆皆稱之

章忠銅陵人幼孤奉母極孝母病割股和羹瘳之後其
母年八十歿廬墓十二年終身蔬食以報之兄嫂客死
京師忠徒步往扶其櫬返時人莫不稱其孝友忠歿郡
推毛起作詩弔之有山中不見幽人跡江上仍傳孝子
名秋老白雲迷鶴表春陰紅霧溼鶻聲之句至今猶傳
誦焉孫益國字孚先亦以孝友稱

葉叢椿字汝靈貴池人家素貧祖母年九十餘父母年
六十有兄偕其嫂俱早逝遺孤一人叢椿盡力孝養
并撫孤姪甫成立相繼三喪拮据殮葬畢其姪又歿叢
椿又撫其孤嫠始終不言瘁時盡賢之

章文煒文燧石埭人素孝嘉靖間其父歿二子同廬柩
側躬負土爲墳葬之哀慟之聲三年不輟有司旌之曰
雙孝

擅世仁字良賁貴池人幼爲邑諸生以母病棄所業文
史徧購方書遂工診治親調藥以進夜則焚香禱天祈
母康健母年踰六十歿居喪極哀而其父尚存遂不忍
一刻離膝下鄉黨交稱之

音一恒貴池人素孝友兄弟五人以奉父居其室忽構
誣獄論其兄遠成一恒慨然代行數歲赦還愈相友慶
在里中多行善事以終其世焉

周聘字延聘號克齋青陽人幼事父母定省無缺儀嘉
靖間父母歿辟踊哀慟水漿不入口者七日及終喪不
離苦匱既欲祔葬先隴宗人難之聘不除衰經者六年
宗人曰喪可以免矣聘泣對曰大事未襄不忍除也宗
人感歎而許之有二弟析產讓其腴者其室災聘望火
拜自咎火遂熄人以為誠信所感云聘素不解占驗居
喪次歲餘忽謂其子曰旦日遠客來盍治具已而果

服闋謁邑博士博士問之曰知今歲舉賢書者幾人乎
對曰舉者三人其一新生也及榜發如其言亦一奇也

舊志無見分省
人物考特採入

廖廷皓貴池人力田養母嘉靖二十八年廷皓耕隴上
虎入其家母適自外採蔬歸遇虎銜其臂而去廷皓自
田中追及之抱虎項且泣且訴願以身代虎初不捨母
隨以拳入虎口母始得脫虎銜廷皓手行數十步亦脫
回乃負母還其室母傷處腫甚廷皓為口吮其毒數升
腫始平母愈廷皓亦患腫數月始獲痊後數年其母病
在廷皓哀痛踰常人年六十餘歿

沈宗烈字師貞石埭人素孝友嘉靖間有姪應嘉以人命論死繫獄中宗烈曰吾弟止此子而此子尚未生子若就死是斬吾弟祀矣乃號慟詣官自誣前殺人者寔我而非吾姪於是出應嘉繫而論宗烈死逾月斃獄中沈唐恭石埭人事繼母最孝謹而繼母虐其兄武恭訟之官繫獄論死唐恭痛武恭尚未生子詣獄代繫以出其兄適大盜劫獄囚俱逸唐恭獨留郡守義而釋之章元縉青陽人嘉靖末割已田三百畝入宗祠以贍族衆郡守旌之

袁德厚青陽人性孝友父歿其庶母有身而改適及一男德厚抱之歸乳哺及長以父業與之而家貧好必予歲祲輒出穀助宗族及賑鄉里臺使旌其孝義王萬年銅陵人性至孝兩割股以愈母疾父母歿俱廬墓三年有司旌之

桂遠治石埭人事母極孝隆慶二年母歿躡踊哀慟廬墓三年後以萬曆四年貢仕爲山東章丘縣丞熊鏜青陽人孝事繼母善撫孤姪歲饑罄貲以賑又嘗助修城工橋道邑舉鄉飲

郎國賓貴池人事繼母極孝繼母生兩弟最厚遇之一日國賓病其弟適以事觸有司禍將不測國賓力疾往

救疾遂不支歿

方瑞祥貴池人性至孝其父母年俱九十餘瑞祥年亦七十未嘗以刻離膝下析家產悉推其腴者與羣從子儀鳳武狀元另有傳

丁杲號一樂貴池人父黹年甫四十即謝家政令杲督之家素貧弟妹婚娶皆出杲經紀而與弟旦共砥礪爲學王龍谿先生目之爲二難云

陳邦騫青陽人素篤孝父母歿廬墓六年有司旌其行徐漸字進之建德人事父母至孝居喪哀慟至失明撫庶出弟妹及孤姪俱有恩誼年八十五卒以子廷宗贈奉直大夫工部郎中祀鄉賢

曹槐芳號思山石埭人父輔恭年四十餘未舉子一日至青陽拾遺金于道還其人歸即夢神人授以子而生槐芳年十四孤哀痛思慕敘其父生平隱德求同鄉畢恭介公作序傳之而竭力以事其母逾七旬始違養人皆稱其孝

桂柯貴池人少讀書事繼母孝繼母所出弟旣幼而孤柯撫教盡其力分父遺業自取其磽确者後其弟領鄉薦而柯隱約終身焉

何一登字念鞠東流人生有至性事親以孝聞而事叔

父母一如其父母以選貢入太學舉萬曆三十一年應天鄉試卒

方時潮貴池人性素孝兩剜肉以愈親疾親病日以口飴之親目復明嘗畜一妾不得於其母即遣還其家以順母意又嘗奉伯父母及撫弟之孤子以終身焉有司請特旌其孝

劉永祚字長伯青陽人幼承家訓善讀書萬曆四十二年父光復以張差挺擊事召對慈寧宮忤旨被逮繫重獄永祚聞之徒跣奔京師入非室供餽橐旣乃擊登聞鼓具泣血陳情願代父罪一疏上之不報再具聖孝光

無窮微臣荼苦莫控一疏上之又報三具父繫弟

臣情苦極一疏上之又報乃以父命歸哀號困瘁以卒士大夫無不憐其死孝作詩輓之弟蔭祚亦具疏願以身代父死歷五年光復始釋歸

張彥貴池人事母孝每日晨昏必拜跪問起處每事無鉅細必告以爲常邑兩舉鄉飲年八十餘歿

江之文青陽人素孝友與弟析父產悉以膏腴讓之而自取其磽瘠者

孫儆祖青陽人少孤事兄如其父及析產以千金讓其兄鄉黨稱之

孫慤述號青華青陽人素孝文研精理學居喪哀毀廬墓九年感馴鵲之異郡邑屢舉孝子以萬曆三十七年貢爲溧陽訓導遷四川忠州學正署州事值懋酋之亂慤述乘城固守賴以獲全致仕歸歷年九十卒學者稱之爲心學先生

陳廷相本姓鄒東流人父早歿以遺腹生四歲而其母復亡祖父母育之至長廷相自傷孤露痛自刻厲而極孝事其祖父母迨承兩喪哀慟幾絕各憲使旌之

陳廷裕石埭人幼育於祖母周氏廷裕最孝事之一日祖母病廷裕割股和藥進病瘳歷年至八十餘始歿後

邦簡登賢書

字本章建德人生有至性母素病達侍朝夕弗暫離母病劇割左股和藥以進母病漸差父病割右股和藥以進父病亦隨愈父母卒哀毀骨立皆廬墓三年萬曆間題賜旌表

章大甲貴池人母羅氏百歲歿大甲年已八十餘猶廬墓三年

宋益宗東流人早喪母事繼母以孝謹稱父年八十臥病益宗割股爲羹以愈之鄉里咸欽其純孝

金魚建德人事親以孝稱又設義田給族人之貧者嘗

於遺金還其主通邑傳之

黃如袞字心元東流人幼孤孝事其母而篤志問學以天啓元年恩貢入南雍鍵戶攻苦屢空晏如也後以子雲會贈文林郎

童黯建德人孝事繼母母病籲天求代母目眊吮之復明母卒泣血三年不御酒肉憲使旌之

邢守義東流人年十七繼母病垂危守義伺父出即剖股和湯假藥以進母病瘳守義終不言其故後人覺之咸稱其孝焉

何希良號雙溪東流人素誠慤弟歿撫孤姪如己子歲一具產市穀以濟族人之無食者生三子一純一縉一皆以善行稱而一縉官山西徐溝縣丞致仕歸市米於荒邑舉鄉飲十一次

姚鑑建德人善事母母年九十七病疽鑑晝夜侍親浣滌其中裙廁踰不假手於人時年亦七十矣母歿廬墓三年

黃如璋字季輝東流人性剴至持身端謹而孝友型俗以上壽終

陳嘉心字若初東流人素講理學事繼母極孝待繼母所出之弟最友于所著有世鑑篇二卷

泗之京字亮孫石埭人八歲喪母即號慟躄踊扶柩至墓留三年不返天啓四年父歿亦廬墓三年時以純孝旌之

甯應祖字子述青陽人幼好學天啓四年舉應天鄉試動以禮自守居母喪三年不飲酒不茹葷一姪孤撫之如其子以是鄉里咸敬之崇禎末土賊起相戒不入其家入本朝高隱不出歿

何一葵銅陵人素講學宗陽明而躬行孝友居親喪盡哀與其弟終身不析爨一族子舉家病疫死一葵悉殮埋之并撫其孤成立鄉黨莫不多其義崇禎末土賊

里相戒勿犯所著有瑣言哀言儒範檢身條目諸編吳涑字岱水貴池人幼讀書輒自夜達旦事親以孝聞即出在舟車無刻不以其親爲念間得甘脆輕煖之物必歸以遺親天啓間遭母喪廬墓三年日作孺子泣遂遘疾臨危猶以不終養其父爲恨歿年三十餘

桂士訓字若庭石埭人性至孝家有祖已邁一夕暴疾汗地士訓剖股和羹進之甦祖母病垂死亦剖股進之而愈父患蠱絕食飲又剖股置藥中進之三年而後歿里中服其孝感云

張懋功字無施號丹井銅陵人治經史工詩事親孝親

廬墓三年所著有孝闡禮俗諸編

江大興建德人事繼母至孝母病風痺不能行大興輒背負之母每欲夜起大興恒不解衣以待如是者三年歿大興哀痛啜粥復廬墓三年各憲使旌之

王學詩貴池人幼從學於丁旦砥飭名行嘗刳股以愈母疾又友愛其弟嘗讓宅與弟居而自結茅以處恬如也天啓四年貢不就廷試以終

汪寬貴池人性至孝其事親悉準古禮不少違而沉酣經史齋志以歿子之崑後登賢書

徐中昔青陽人素孝父喪廬墓三年

方祥美貴池人性孝友母病醫藥不得效乃虔禱於文孝神祠母疾頓愈有幼弟爲母所鍾愛喜依其居每膳祥美輒負其母來食已仍負之迄積十數載以爲常未嘗以爲症也後其弟坐盜誣繫獄祥美盡鬻已業以贖之爲有司所獎異

陳光正石埭人少孤嘗自痛不逮養其父也事母加謹順治十一年母歿扶櫬與其父合厝于原即廬其側哀號顧慕日夜不休忽湧醴泉于石罅見者以爲純孝所感云

廬墓三載母素善病國雋偕其妻嘗禱諸神願減已算以益母壽後其母至八十餘乃終

江元嵩青陽人家素貧工書每以書取貲養父母父晚歲盲目元嵩日舐之母久病元嵩侍湯藥積歲不少休至一切嫁娶之事皆力任之鄉黨以是稱其行

桂輪字一之石埭人幼習兵法及推步家言明末遊京師歷塞外無所遇而返孝事其親竭菽水之奉入本朝其親歿結廬墓側朝夕爲孺子啼者三年不輟後乏食入市賣藥以終其身焉

吳來芳建德人早喪父其母以遺腹生故事母倍謹不敢一日離及母老來芳亦年六十母疾必親湯藥夜不解帶以侍鄉黨咸服其至行

王明建德人早喪母哀毀不欲生而事繼母一如其母迨後父病瞽使明督家政葬高曾以下十五喪撫諸從弟皆俾成立而親故有貸明財者輒不責償并焚其券歲饑輒出粟以賑所著有進修錄

余心曠銅陵人家素貧業耒以養父父繼可膺歲薦而衰疾踵至忽患淋不利溲溺心曠遍求方治之不效乃以口吮其陰淤盡而溲溺復利後其父歿居喪以執禮

崔必遇銅陵人幼失母事繼母以孝稱繼母生兩子甚鍾愛必遇承母志推父腴田百畝與之而躬自授徒以給朝夕焉

王之義字仁卿建德人幼孤竭力養母康熙十年母病侍湯藥勿少休及歿葬於所居之西山即廬墓側刻木爲母像奉之及禫始返邑人士競作歌詩以傳其事

朱應舉字秀之貴池人七歲喪母其繼母虐之應舉不以聞諸父而躬自力作於外得美食必攜奉以爲常父歿析產悉推其腴者與繼母所出之弟其弟鬻之人應舉爲贖歸之以是繼母亦感悔而應舉事之愈謹喪葬盡力焉又素敦厚嘗道拾遺金候其人還之而姻黨以匱乏告者無不應嘗築晏塘橋邑人俱稱其善子鳴舉領歲薦以文行名

施家聖貴池人生未週喪父母桂氏育之至長力田盡養每先意承之先是家聖有兄天其母思念之成疾家聖爲立嗣承祀而後母即安母六十家聖即偕其妻日禮斗祈母壽後其母歷一百有四歲始歿家聖年亦七十餘矣猶哀毀執禮既葬廬墓三年

晉國時貴池人年十八父病榻每夜侍湯藥輒焚香告

願以身代父歿執禮悲哀遂終身不御酒肉母疾割股進得延數年歿哀毀如前喪而撫弟妹辦婚嫁畢復割所置田宅授之他如卹從叔之喪存撫孤寡以及厚姻親篤師友好行其德至老不衰歿之前三日猶焚借券百十紙鄉黨皆以善人稱之

汪可植貴池人年二十一喪父號慟執禮不飲酒不肉食者三年而奉母必致甘旨弗少缺明末左兵擾池州直被掠晝夜哀號哭母久之賊感動放植終養同母弟兩人俱早歿可植卹兩嫠婦俾守志而撫五姪俱成立焉庶母生一子甫五日而以產亡可植命其妻朱氏乳

池州府志卷第八十四

中憲大夫知江南池州府事加六級襄平馬世永編纂

義行傳上第二十七

唐江迪湖青陽人天寶十四年歲饑迪湖出粟賑濟邑令以其事聞下詔旌獎

宋甯文達青陽人居陵陽鎮元豐間大水里中漂溺者千餘家文達出粟五千石以賑邑令李廣以其事聞下敕褒獎里人立祠陵陽祀之

元何清甫青陽人大德七年歲饑清甫出粟二千石助賑知縣喬昇以其事聞詔旌其門

明余志貴銅陵人系出宋義門及志貴生而尚義宣德七年銅令商賓倡建學宮志貴與昆弟志英志高共捐已貲建本學先師殿志貴又建郡庠明倫堂徽州朱子祠且遺訓子孫令世世修葺以繼厥緒焉時守令即加旌獎至正統間祀邑鄉賢准免其子孫一切雜泛徭役永著爲令而余氏子孫由明季至 本朝屢修先師殿上官及守令亦屢加褒獎准免雜徭如故

徐昱字尚德銅陵人素孝友其家千指同炊而每創義舉當宣德景泰成化間五值歲饑俱出穀助賑而一爲邑人代輸漕米又嘗築橋道寺觀都憲吳琛爲作義翁傳以表之

徐永元建德人其家六世同居永元爲之督正統三年饑永元出穀二千石備賑有司上其事爲賜特敕旌爲義民勞以羊酒復其役五年永元隨詣闕謝又賜酒饌於闕門里人柯暹爲之作記

章禧遠青陽人正統間饑禧遠出穀二千石備賑有司聞諸朝亦賜敕旌爲義民如永元事

方守仁石埭人正統九年饑守仁出穀二千五百石備賑有司上其事賜敕旌爲義民如禧遠之例

楊時遇石埭人正統九年饑時遇出穀一千五百石備

賑有司以聞賜救旌為義民與守仁等
屈永德建德人正統九年饑永德出穀二千石備賑有
司聞諸朝賜救旌為義民如守仁時遇

黃學通建德人正德間饑銅陵尤甚學通出穀三千石
備賑有司以聞賜救旌為義民其例視永德等

李積惠字春明貴池人正統十一年饑積惠出穀二千
餘石備賑有司上其事賜救曰國家施仁養民為首爾

能出穀二千石用備賑濟有司以聞朕用嘉之今特賜
救獎諭勞以羊酒旌為義民仍免本戶雜泛差役五年

尚允蹈忠厚表勵鄉俗用副朝廷褒嘉之意欽哉故救

貴池鄉賢

按徐永元以下六人所賜之
救大約同此茲就存者載之

源貴池人成化二年饑銅陵尤甚浩源家有米五

石悉出以賑人德之白於郡守以例給七品冠帶浩

源不受次子綱亦好義嘗浴池中得遺金一囊訪其

人還之成化間亦兩捐私廩助鄰里之饑者

孫俊貴池人成化二年饑俊出粟五百石備賑郡守以

例給七品冠帶獎之

章伯通青陽人成化二年饑伯通出粟九百斛備賑郡

守以例給七品冠帶榮之

江鈺青陽人成化二年饑鈺出粟五百石備賑郡守以

例給七品冠帶榮之

袁思瓊銅陵人其家五世同居嘗獨建學宮明倫堂又
勸築石橋弘治初學使者旌其門給以肉帛子泰克繼
其志正德間銅陵遷學泰仍建明倫堂遇饑歲出穀賑
貧者泰子滋萬曆間亦重葺明倫堂并建邑城隍廟修
橫塘埂造石橋至今稱其世美焉

方諭貴池人弘治間出穀二百五十石備賑孫一坤萬
曆十六七年亦出穀備賑且置榷殮死者曾孫端美
本朝順治四年亦輸銀備賑郡邑歷旌之

王致祐青陽人嘉靖三十九年饑出粟五百石備賑

又置倉貯穀六百石借給貧人歲秋成償本數以爲
義倉又置長稔田二十五畝爲其族人遠戍者軍裝畜僕
賈里黨德之

致鳴青陽人父璉樂施予多修建致鳴繼其志嘗出
穀賑饑者又嘗捐已貲葺儒學城隍廟當道給冠帶榮
之

姚添建德人嘉靖間池饑添出穀數千石賑及三邑有
司欲以例請旌添不可乃止

金鑑建德人嘉靖間石埭大饑鑑出穀二千石往賑巡
方上其事朝命以綵帛羊酒勞之

檀萃建德人嘉靖十四年饑萃捐米五百石以賑其弟
蒂亦嘗輸粟食饑者又修學宮里人咸多其義
柯子禎建德人萬曆十四年饑立厰煮糜以賑又嘗飲
助邑中六工役鄉人德之

鮑東青陽人性好義而不豐於貲萬曆二十二年饑東
出穀五百石以賑監司以尚義旌之

歐陽潮字汝亮東流人萬曆末歲饑潮捐穀賑濟賴以
全活者甚衆

陳其恭其葵銅陵人邑東北仁豐三圩向無隄埂江水
內灌則三圩盡為巨浸崇禎十一年其恭兄弟捐已貲

繁昌縣民地為隄脚創築隄四百餘丈高二丈餘闊
數尺三年始訖工自是圩無水患居民祀田祖必頒胙
于其家焉

李名揚

府志作
明揚

貴池人崇禎十四年饑道殣相望名揚

即所居唐田日作糜賑饑者又掩死者子育陽亦以善

著孫公錫 本朝順治三年六年饑亦出粟賑鄉里

施立名貴池人崇禎十三年捐穀賑饑者子光閭 本

朝順治九年亦捐穀賑饑者孫家修素孝欲承先志康

熙十年災捐穀以賑十八年災又捐穀并請縣放積穀
以賑三十二三年間家已中落災猶質衣鬻產購米以

賑郡守嘉之名其里曰景仁里

本朝胡汝涇石埭人素敦行順治六年饑汝涇首捐穀二百石以賑鄉里稱之

王正繩字用周青陽人素孝友敦行順治二三年間池連旱正繩每年出穀二百石以賑里人德之

張紫遴貴池人素急公每遇歉歲輒多方賑鄉里孫裔熾繼之康熙四十七年饑亦捐穀百餘石賑饑者

俞錦鉉銅陵人素敦行好義康熙十一年旱煮糜賑饑者二十五年捐已貲重建邑學之尊經閣及紫陽書院三十三年旱又煮糜爲賑其他建造修築施榷濟窮諸事率歲舉以爲常邑人皆多其義

余義銅陵人志貴之裔承祖遺風樂善好施不一而足至修先師殿倡首捐財通邑義之阿制府以崇聖繩武顏其堂江東爭傳其世美焉子錦成貢士鏞成郡庠績成負才早歿妻畢氏貞節自矢待請旌表

章之盛銅陵人銅邑學宮向皆出土族修建而敬一亭一區自明末燬于兵諸碑刻皆斷什茂草康熙二十八年之盛爲復建亭於故址未竣工病命其子爍成之更募勒諸石刻豎其內學使者以孝義旌之

池州府志卷第八十四

府志卷第八十五

中憲大夫知江南池州府事加六級襄平馬世永編纂

義行傳下第二十八

許規唐許遠四世孫攜家居貴池一日在宣州客邸
聞笳舍呻吟聲就問之曰我建康人將有所往而病於
此規爲請醫治之不愈其人知規長者檢囊得百金託
以後事且曰其所餘者悉奉君及卒規爲具棺殮以餘
金詣建康訪其家還之後其子逖員外郎孫元天章閣
待制知揚越二州

明季用質石埭人洪武間爲縣吏適主簿某犯大法事

連用質謂之曰吾與若俱死無益也若能獨承之矢報于世世用質許諾及就讞乃自誣服脫簿罪而身繫獄將刑會赦放還中道獲一遺橐內一檄及楮帛千餘緡用質坐道旁兩日候失橐者至還之後孫廷璋成進士施幹號菊莊貴池人正德間歲貢仕爲湖廣新寧知縣歸性素嫉惡有邪回其行者輒面斥勿少避時目之爲古直云

李廷臣號呆樵貴池人性醇謹治家有法度正嘉間以國子生爲山東堂邑知縣歸不一出謁守令惟冬至正旦聖壽必至郡隨班行禮郡守重之數舉鄉飲賓以龍異焉

江鍵青陽人幼讀書敦寔行以嘉靖二十七年貢仕湖廣鄖陽府通判致仕歸檢故麓得父所遺舊券皆親知逋負未償者各召其人還之

江本青陽人幼讀書動遵古道嘗有暮夜持千金于以私者爲書四知二字却之亦終不言其人姓氏後訓子姪有淵有澧皆舉于鄉焉

劉裕貴池人好行善事歲埋齒掩骼以爲常嘗建城西七里惠橋三座以濟行旅一日經渡口適一人浴水濱遺金一橐而去裕候其人還之里中至今傳爲美事云

孫岐曾孫正蒙另有傳

李東壁字明卿貴池人少力學不問生產其家政聽從元弟操之不較出納嘗書司馬溫公我箴王陽明先生諭俗置座右以自省并示子姓焉以萬曆二年貢為江西德化縣主簿遷饒府紀善歿

檀昂建德人素好義一日于黃泥岡拾廣信解尸孫德遺官銀三百兩驗實還之

劉光漢建德人素持行取與不苟嘗省其次兄于官却所贈不受而撫伯兄之子如己子焉里中有病妖者適光漢至妖滅人以為正氣所感云

姚鏐建德人生平謹厚樂施予族黨多貸鏐金者鏐病革取逋券悉付諸火語子若孫曰毋遺汝輩以財賄致傷戚黨式好情也卒年九十九曾孫秉鈞亦能賑饑瘞殮修輿梁道路以世其德焉

劉介卿書陽人善事繼母愛諸弟卹宗睦鄰年至七十未嘗一入城市歲歉穀貴輒傾倉廩貸人不少客屢焚逋券里人德之孫光復

陳可遠石埭人素謙謹篤師友之誼有貸可遠金者不責報一徐氏子有急難揮五百金救之絕無難色鄉黨以是重其人

善府志作桂遠可

全精器號南華建德人幼篤倫誼娶婦死於火傷悼倍
至以選貢舉萬曆二十二年應天鄉試官湖廣武昌府
同知空幃僕被不再娶亦不畜妾婢以終其世焉

王棟字汝才銅陵人素孝友敦本尚義邑中有大工役
如建尊經閣築學宮周垣濬玉帶河沿南門道棟皆任
之而掩骼施棺及施茶煮糜之類率歲舉以為常里中
有楊氏託孤于棟棟為部署家產不稍私且為瘞羸金
于土俟其孤長授之萬曆三十六年四十一年皆大水
棟兩捐橐金走千里購穀歸賑郡舉鄉飲賓旌以棹楔
甯象宸青陽人生平多善行遇歲饑必多方設賑鄉里
德之

吳文元青陽人素謹厚鄉里有爭訟者每捐金兩解之
萬曆子丑間歲祲嘗出穀以賑

江鯤號南溟青陽人幼好學從施達講習于天柱講堂
有廚顧之日嘗仿范文正公義田詎捐田立江氏義塾
延師訓族子貧者多賴以就學歲饑出穀周鄉里其有
婚喪不能舉者咸助之崇禎二年以國子生授陝西布
政司理問歸訓其二子浩然煥然並著儒雅樂施與而
浩然尤高潔自好晚棄諸生隱天柱峯以老焉
即天徵貴池人少有至性長好義嘗于旅中贖難女還

其家崇禎十六年春楚帥左良玉以兵屯池州城中震
恐兵備程世昌欲犒師難于將命者大徵請往說良玉
退師城以不破既又欲屯東流大徵復緩頰言曰大將
軍不世之業豈可付諸東流乎良玉聽其言竟以全師
出池境去子必光性仁孝郭太守以世德續承願其堂
李蕩字元貞貴池人素孝友以端方砥俗而尤敦古誼
一故人子貧不能自存蕩爲婚娶資給之里中擬之劉
孝標焉

吳大瑄青陽人好施予歲祲嘗輟食濟人亦嘗焚逋券
里中以菩薩稱之

光祚號華丘貴池人素好義族有以繼嗣相競者光
祚曰何至以財利傷天倫乎乃推己業爲定其嗣一滕
姓者爲逋負所窘將自裁光祚代償之如其數未嘗市
德也後以子以運贈文林郎

袁國光字貞求青陽人素敦厚嘗遊新安逆旅拾遺金
俟其人還之娶一妾甚姣好而窺其意不願爲側室即
歸其父并不索還聘金里中咸稱其高誼

王一奎貴池人素好善天啓間于郡西孔道建一亭憩
行者每夏施茶于其內顧太守元鏡名其亭曰助龍蓋
以亭爲郡城來脈也子命臣能世其德喻太守成龍列

其名于旌善亭

沈養浩字仲善石埭人家素饒于穀其倉與人鄰而同付一守者一夕盜入鄰倉竊穀以去養浩恐其鄰究盜必累守者乃以已穀移實鄰倉以泯其跡焉家一婢其族子求之養浩不許族子疑其吝倍價以請養浩曰此女素病故不許爾非有他也若必欲得當歸爾其無悔乃封識原金以待踰年婢死出金還之

章耀中石埭人素敦孝友好施與生平多周人困乏賻有喪修葺橋梁道路逾七十歿人皆稱其善

章一守號玉臺貴池人幼貧耕東山下見一穴露石竇其間其田半畝是歲旱鄰田俱無獲獨一守田獲粟倍由是裕于財有貸一守金者一日偶過其家其人辨一守來索負驟應之曰有有既而見十數人踉蹌至一守疑其為盜詰之乃主人鬻婦以償諸負十數人皆索負者社媒氏也一守大驚即解橐為償諸負全其夫婦而返又里中一婁人居山幽盜過其舍強之炊後盜敗誣及婁者一守為力辨脫之以是里中咸多其高義生十子百孫與其妻壽俱九十餘以及其嗣衣冠稱盛李嘉貴池人素剛直有揮霍才里中一巨猾逞搏噬為人害人多為之徙避者嘉設策除之里中以靖土寇至

四一人又棄其居奔嘉請官兵駐守由是一方無寇患而嘉乃棄諸生灌園課農桑以老焉

柯孟顯字惟達貴池人幼孤事母孝不妄交遊遭明末世亂遂棄城市築室劉婆磯讀書垂釣不一與戶外事崇禎十三年郡大饑出穀賑鄉黨賴以全活者甚多入本朝歿以子仲實贈奉政大夫河南開封府同知徐國鼎字元調青陽人素持行好施嘗捐產贍族人遇歉歲發廩以賑人皆德之

吳希沛貴池人素好義課孫運新成進士舉鄉飲年八十餘卒

汪天泰貴池人性好施多行善事嘗買地作義塚

徐自達號斗南建德人幼讀書熟悉前言往行又通時務而好惡不私凡里中軍民徭役工作興革之事悉諮之無不竭慮以應順治九年卒故冢宰鄭公三俊題其墓曰處士斗南徐翁之墓并爲之誌焉

本朝曹大統字遂初貴池人幼攻儒篤孝友明崇禎十六年春亂兵躡池州各鄉落大統請行團練法募丁壯禦之衆賴以自保時賊多掠婦女大統輒捐金贖還其夫家順治四年康熙元年十一年歲俱大祲大統皆捐米煮糜或計口授糧以賑每歲大寒必製絮襖給無衣

考置糶給不能殮者他如助婚嫁調困窮不一而足乎
三年春病革猶還親知數千金之券而歿可謂好行其
德者矣五子十數孫有仕者

江景東流人性豪爽好義所居瀕大江嘗置一棹拯溺
者行舟多賴之

沈見大字識之石埭人幼篤孝友慷慨仗義順治二年
沈氏所居龍巖以匿賊抗大兵例應屠見大痛哭陳當
事始得免事已或勸之仕見大謝曰余前國子生也義
不可出且前歲之役得保首領足矣敢望貴乎康熙十
年十一年連歲大饑見大傾橐市米數千斛賑饑者他
如治津途置義塚焚逋券種種善行鄉里德之年七十
二歿宣城沈壽民爲之傳稱其有古人風三子巖萃崔
孫思敦思倫皆敦又行能克家者

章如玉貴池人幼孤事祖母至孝兩性敦厚不苟言笑
歲役嘗捐穀數百石賑饑者寒製絮襖給無衣者又置
糶給不能殮者常時葺橋梁治道路憲使皆旌其善行
陳光暘字時若石埭人素砥行明崇禎十三四年間歲
荒光暘即多出穀散賑鄉里并蠲宿逋無算順治十八
年邑有飛渡橋爲大水所圯光暘捐數百金築之于是
邑令嘉其善爲舉鄉飲

蘇際颺字殿颺石埭人素秉正鄉黨稱持平順治三年
饑首捐穀倡賑饑者賴之邑下邨大石洪渡為微浙孔
道水漲則行者病涉康熙三十年際颺為審形勢捐金
倡築一橋名允濟由是行旅無徒涉之患

湯懋隆石埭人性好施尚義康熙八年首捐金助修文
廟并嘗葺橋梁之將圯者埭尉陳日章死喪不能歸懋
隆為購地葬之一友歿其子貧無以自存懋隆為之卜
葬且為其子娶婦焉年既老兩舉鄉飲以卒

桂友義石埭人素好施康熙八年邑庠建尊經閣友義
首捐已橐以為之倡焉十年邑大饑復捐米備賑邑令
旌之

吳日光青陽人幼孝友好善樂施中更喪亂即隱居不
出宗族推主家政設立規條為董戒子姓無犯科者晚
歲舉子襄教之學問卒成名給內廷筆札而日光邑
舉鄉飲年近九十無疾終

方時起貴池人素淳厚里中有鬪者輒不忍其終訟為
捐已橐息其爭遇歲凶則捐穀以賑邑令旌之

王尚詳青陽人素孝善事繼母而息爭解紛嘗焚借券
凶歲出粟賑饑全活者甚夥鄉里德之係十八都庠
王之鼎建德人素孝友并厚宗黨恤親朋好行其德若

有紛爭，構訟者必和解之。遇露骸未掩者，必瘞之一。道拾遺金，候其人還之。及老邑舉鄉飲。

沈大俊字籟吾，石埭人。幼有至性，喪父母，善撫諸弟，而輕財好施。子明春字時弁，能繼其志。康熙十年，災倡里中，捐賑最力，一鄉德之。

王之從字順卿，建德人。素孝友，執母喪，盡哀善事。兄撫恤，兄子而與人誠信，每出已貲周人。貧困設渡船，施棺槨，好行其德，有司旌之。

王宗軻字孟達，建德人。素性誠樸，教孝友，講仁讓，與物無競，而訓子弟以詩書節儉。有司屢舉鄉飲，賓。

王宗瑞字聖徵，建德人。素敦孝友，守忠信，每多濟物利人之舉，而訓子姓以崇本力業。有司旌之。

儲傑元，貴池人。素好學，事母以孝聞，而持行端慤。康熙三十四年，府庠有桂藻者，應貢而傑元次之。學憲張公以藻有桂，誤欲黜藻，而貢傑元。傑元為藻痛哭，以請始錄藻，而深嘉傑元。有讓德石埭唐雲龍者，素與傑元交。唐無子，而其妻悍，勢不可以置側室。傑元乃出橐金為唐納一妾，子維揚逾歲生子，順生。偕之詣傑元，而唐病篤，將歿，傑元慨然分宅居之。復為順生部署歸計，而後返。其宗他如捐貲修學，出穀賑饑，皆為郡邑所推重，以

求熙三十五年貢歷壽考以卒

王景字爾介青陽人早喪父稍長事母及祖父母克盡孝道嘗捐財以息爭訟施粥米以賑饑荒子多而賢惟權楷大稱一難守令疊旌之

章斐然字非文章玉臺之第六子也以諸生有聲庠序性孝友言父母得其歡心昆弟艱難身任力濟且遇事能斷有用世才人有急不惜捐己貲解之至晉治宗祠延師訓子俱堪矜式與其妻方氏亦俱九十餘以歿長子必選庠生次廷芳副榜貢生今其子孫頗稱盛焉

章循之貴池人素好善嘗賙人以財喜治道路葺橋梁以便行旅子顯任繼之每歲底輒出米製衣濟凍餒者守令俱旌之

杜如甫銅陵人幼孤育于伯父終身孝事之歿亦殯墓盡禮又當兵氛孔亟有以子託者避亂山曲矢而復得卒能保全人服其義生平意氣自豪扶危濟乏又其餘事也